





藏書

三

樂



皇圖永固 帝道遐昌
佛日增輝 法輪常轉

妙法蓮華經弘傳序

道者山如意野老 祥邁

註



梵 有二音符虫切馮木得風聲也符宴切飯佛在西域之号

妙法

注曰梵云薩達磨此云妙法或云正法蓋薩達之中含攝二義故秦本妙法晉本正法皆無失也具十妙

義獨勝餘經故云妙也一乘真宗中道予義故云正也

住持真理為物軌範故云法也天台玄義慈恩玄贊廣

陳義門此不具錄

蓮華

注曰梵云奔茶利迦此云白蓮華白為衆色之本

一乘為餘乘之宗故取喻之如下經中初放白毫之光

終賜白牛之駕是此義也蓮華者居泥不染因果齊彰

喻前妙法開權顯實會三歸一明佛知見不同餘經法

喻雙題故云妙法蓮花

經序 注曰梵云素咀纜此云契經契謂契理契機經謂貫攝常法即契理合機之教故云契經今畧契字務從簡也述經奧旨叙列源由名為序也故天台曰發秘密之奧藏稱之為妙示權實之正軌故彌為法指久遠之本果喻之以蓮會不二之圓道譬之以花聲為佛事稱之為經圓詮之初目之為序此經蕩化城之執教廢草菴之滯情開方便之權門示真實之妙理會眾善之小行歸廣大之一乘文博義深餘經莫及若廣說者妙有十妙法有三軌蓮花六義經有六釋具如玄義中說更有光宅疏文慈恩玄贊學者知之

終南山釋道宣述

注曰終南山名在長安城南與秦嶺

太白太一皆連接也在扶風武功縣關中記云終南一名中南在天之中居都之南故曰中南三秦記云終南一名地腴可避洪水道宣律師名也姓錢氏彭祖之後湖州長城縣人隋吏部尚書錢申之子生於隋開皇之間大作佛事於唐太宗高宗之代文采照灼戒德不群製四分律鈔弘贊毘尼又述弘明僧傳等百有餘卷有時行道失跌感韋將軍捧足錯裁座具致黃瓊天人指授借得天上舍利流布人間別有感通傳具詳異事謚號澄照大師法華要覽云師述序時常天以法華尊上未易冠言遂稟報十方諸佛佛皆許肯即今法華經

之序也。故慈照頌云：南山大士最幽玄，撮成樞要在經前。常馱天將親垂報，十方諸佛許師言。

妙法蓮華經者，統諸佛降靈之本致也。

注曰：致意也。諸佛出世本說，此經開方便門，示真實相，誘火宅之癡子，指衣下之明珠，悟諸法空，入佛知見。故下經云：諸佛世尊，唯以一大事因緣，故出現於世。所謂欲令衆生開佛知見，使得清淨，故出現於世。欲示衆生佛之知見，故出現於世。欲令衆生悟佛知見，故出現於世。欲令衆生入佛知見，道故出現於世。是為諸佛以一大事因緣，故出現於世。天台師云：一即法身，大即般若。若事即解脫。此之三法，衆生本具，為因。諸佛顯示為緣。

出世元意，祇為此矣。此釋一大事因緣，四種知見，以四義釋一約，四位二約，四智三約，四門四約。觀心皆言佛知見者，謂分真之初，三智五眼一時開發，同入一乘。諸佛實相也。天長釋云：非三非五，故云一。廣博包含，故稱大。說此化生，故曰事。機能感佛，為因。佛隨彼應，名緣。有此一大事之因緣，所以出現於世也。開示悟入者，上一二即能化，謂大開而曲示，下二即所化，謂始悟而終入。知即根本智見，即後得知，亦名一切智智。南嶽思大師云：開佛知見，是十住位。示佛知見，是十行位。悟佛知見，是十回向位。入佛知見，是十地位。及等覺位，皆言佛知者，得一切種智也。皆言佛見者，悉得佛眼也。此約位。

釋谷響鈔云三智圓觀名佛知五眼圓覺名佛見
蘊結大厦出彼千齡東傳震旦三百餘載

注曰蘊結積聚也大厦西域也震旦東國也佛滅度後
千年之外教流東方故積聚西域出於千年也自西晉
法護創傳此經至於唐國三百餘年也

西晉惠帝永康年中長安青門燉煌菩薩竺
法護者初翻此經名正法華

注曰晉司馬氏都於洛陽望於東晉故云西晉惠帝世
祖之子永康惠帝年號青門長安東門本長安霸城門
俗呼為青門竺法護本月氏國人後移居燉煌故又為
燉煌郡人也少出家傳道為懷以西晉之代來化洛陽

立寺於長安青門外設像行道助誘後徒譯出衆經光
揚像法人美其德號為菩薩初翻此經名正法華經勒
成十卷其真言字句皆作晉言

東晉安帝隆安年中後秦弘始龜茲沙門鳩
摩羅什次翻此經名妙法蓮華

注曰西晉遭亂元帝渡江建都江東故云東晉安帝孝
武之子隆安年號後秦姚興也弘始姚興年號晉
居正位秦為旁僭故先舉晉而後秦也鳩摩羅什龜茲
國人傳教秦邦大弘佛法譯出般若維摩等經智度中
百等論再翻前經名妙法蓮華經文成七卷今所行者
隋氏仁壽大興善寺北天竺沙門闍那笈多

後所翻者同名妙法

注曰隋氏謂隋文帝也仁壽文帝年號闍那笈多三藏法師名也笈多與師那連提梨耶舍同來此土文帝禮重安置於大興善寺官給所須譯出衆經後翻此經名添品妙法蓮華經十卷但於樂草喻後加千餘字外者皆與羅什本同

三經重沓文旨互陳時所宗尚皆私秦本

注曰上之三譯本是一經故文詞意旨重沓互有世人傳讀皆私什譯

自餘支品別偈不無其流具如序歷故所非述

注曰宣公作大唐內典錄十卷備括衆經談論本末今

言三本之外更有支流別行品偈具如所撰內典錄中事多冗雜故此不述也已上序翻譯源流已下述本經旨趣

夫以靈嶽降靈非大聖無由開化

注曰靈嶽降靈謂山嶽蘊英靈之秀生此靈明之大聖開化世間意借詩中惟岳降神生甫及申之文也靈神也彼美賢臣降生此歎聖人現化降神也

適化所及非昔緣無以導心

注曰佛雖大聖不化無緣之人故適化所及皆有昔緣開導其心故開今所說方能信受也

所以仙苑告成機分小大之別

注曰仙苑即波羅柰國鹿野苑也是昔五通仙人聞宮女音墮落之處故又號仙人苑也如來世尊初成佛後向此苑中三轉法輪諸聞法者有登大乘位者有證小乘果者從此世間有大小乘蓋隨機器分也

金河顧命道殊半滿之科 注曰金河即拘尸那城北阿利羅跋提河此譯為有金河河畔有娑羅林如來於此娑羅林中入於涅槃顧命謂命將欲終而垂言教謂之顧命昔成王將終作顧命之書今佛將終說涅槃之經殊分也如來於彼涅槃經中說半滿二字分大小二乘豈非教被乘時無足覈其高會

注曰仙苑初昌金河終談道分大小者豈非教被隨根

乘時設化但愧無足得預考覈於高會也
是知五千退席為進增慢之儔

注曰如來將說法華一乘五千比丘禮佛而退者欲顯今經甚深令增上慢人進求大乘亦

五百授記俱崇密化之迹

注曰富樓那等五百聲聞於古佛所久脩梵行皆蒙釋迦往生勸化內蘊菩薩外現聲聞今於法華會上俱得授記作佛

所以放光現瑞開發請之教源

注曰放光現瑞發起教之因緣也如來初放白毫相光照於東方萬八千界於是弥勒觀七事以騰疑文殊擬

十因而領答此起教之因緣也

出定揚德暢佛慧之宏略

注曰佛從定起明二種甚深演暢佛慧之大畧也二甚深者一證甚深經云諸佛智慧甚深無量二阿含甚深經云其智慧門難解難入此序意也

朽宅通入大之文軌

注曰此火宅喻也火宅喻於三界諸子喻於衆生火宅門外而設三車喻昔權說三乘也末後等賜大白牛車喻今實說一乘也破三顯一誘入大乘此如來之本致也光宅疏主立四乘教義准於此化城引昔緣之不墜

注曰此化城喻也化城喻二乘寶所喻於大乘勸進二乘令歸一極勿滯權宗而為究竟昔為王子已化汝等今說法華再引令入此上三句明三周之旨也

繫珠明理性之常在

注曰繫珠喻也珠喻一乘佛性醉人衣下而繫寶珠昏沉不知枉受辛苦喻諸聲聞佛於往昔大通佛所為王子時以大乘法而令發心多劫廢忘不知不覺既得羅漢以少為足今蒙佛說昔事方憶授無上記喻如親友指珠示之令離貧苦

鑿井顯示悟之多方

注曰鑿井喻也水喻法華一乘穿鑿求之喻聞解思修

若見濕泥知水必近若聞法華成佛不遠開示多方令人悟入又乾土喻如衆生濕土喻如二乘泥喻菩薩水喻諸佛

詞義宛然喻陳惟遠

注曰佛說此經言詞義理明白宛然譬喻鋪陳其致惟遠非佛智深悲厚孰肯如是

自非大哀曠濟拔滯溺之沉流一極悲心拯昏迷之失性注曰哀悲也曠遠也一極至極也言三周七譬顯示一乘四行六記攝諸含識文喻巧妙勸進諄諄拔出生死之流援極昏迷之性自非如來大悲遠濟至極慈心誰能如此

自漢至唐六百餘載總歷群籍四千餘軸受持盛者無出此經

注曰大教東傳自漢至唐中間經籍四千餘卷受持轉誦斯經獨盛

將非機教相扣並智勝之遺塵聞而深敬俱威王之餘勳注曰勳功也相扣也言根教相接聞而便敬之人皆大通智勝佛之遺塵威音王佛之餘功也

輒於經首叙而綜之庶得早淨六根仰慈尊之嘉會速成四德趣樂土之玄猷

注曰庶冀歆也此經殊勝隨喜者獲五福書持者淨六根仰攀也慈尊嘉會謂慈氏如來龍華之會也四德謂

涅槃具常樂我淨之四德也樂土謂法性常寂光土玄妙也猷道也

弘贊莫窮永貽諸後云爾 注曰貽遺也言弘贊此經永遺後代真流通之無盡也

妙法蓮華經弘傳序終

妙法蓮華經要解序

前住福州上生禪院嗣祖沙門 及南 撰

諸佛出興唯為一事千經所演無有餘乘直以妙萬法而明一心即幻華而示實相則妙法蓮華經者諸佛之本宗千經之轄轄一心之元鑑實相之妙門也秦譯已還垂八百載訓辭釋義代有哲人而責備求全乎有得失信曰滿世間之驚子如恒沙之菩薩盡思度量莫知少分故雖多歷講解有所未盡而潤色評論不拒來者溫陵蓮寺環師深究一乘博探眾說研幾摭要為之科解宣和己亥初辱不鄙命予校證既又遍質宗匠務契佛心越丙午復會予南山討疏尋經叅詳再四點名相芟繁莫使入佛知見者無摘葉尋枝之厭有析薪秉燭之觀足真能發明祕要之藏也或者扣師七軸文中何處為正說妙法曰千經萬論唯為此事豈茲一席輒有異談世尊以是而開示羣迷以是而悟入火宅以是而出離寶所以是而前進若等多劫以半

日現大千於一身龍女之成佛不輕之遍記藥王之然身觀音之隨應淨藏之轉邪普賢之勸發凡以是也不明此事則滿目陳言開佛知見則孰非妙法竊觀一期之問答見全經之述作矣儻汭披味深造而自得遂可跏趺無量義處反照白毫相光開方便門示真實相直拋糞器長御白牛則一乘妙法備在我而不在佛備在心而不在經矣譬如琴瑟笙篴雖有妙音若無妙指終不能發則夫欲發明是事當以斯解為妙指也
靖康丁未莫春中澣日謹序

妙法蓮華經卷第一

溫陵開元蓮寺比丘

戒環

解

開釋科五

初通釋經題

參學門人

刊

實相妙法巧喻蓮華內則直指乎一心外則談通乎萬境方華即果處染常淨此蓮之實相也生佛本有淪變靡殊此心之實相也其狀虛假其精甚真此境之實相也心境萬類通謂之法精粗一致凡聖同源即諸世諦觸事而真言詞不可示分別不能解故以妙稱也六趣之所迷淪蓋迷此也諸佛之所修證蓋證此也洎夫廣演言教無數方便蓋為此也但以衆生垢重根器未純先說三乘假名引導故權而未實鹿而未妙及乎諸糞既除心相體信乃示實相會歸一乘則妙而無鹿矣諸佛能事終畢於是也然所謂妙法非去鹿而取妙蓋即鹿以顯妙也所謂一乘非離三而說一蓋會三而歸一也即鹿顯妙猶蓮之即染而淨會三歸一猶蓮之自華而

實法喻雙彰名實並顯故號妙法蓮華夫證是法者必以大智為體妙行為用智譬則蓮行譬則華智行兩全乃盡其妙故經文始於一光東照智境全彰終於四法成就行門悉備正宗之初三周開示皆所以明體也囑累之後六品敷揚皆所以明用也中間轍迹無非智行旁顯體用兼明彰實相之大全列開悟之真範發明種智成就果德故若有聞者無不成佛凡能領悟即得受記一事一相無非妙法也由是而往山河大地明暗色空擴而充之則物物燈明智體推而行之則步步普賢行門直下即法以明心不復離物以觀妙則所謂大事因緣一題盡之矣

二通述鄙意

欽惟斯典盛行於世人莫不願洛誦深造而每見其難能者非經之難特傳記難之也夫傳以通經為義辭達則已類且繁分名相虛尚多駢煙颺細科塵飛雜辯滔滔謾謾杳莫可究所以難能也竊觀近世明經之體一於經旨不泥陳言欲

約而盡深而明釋義不出科目立言必求綸貫煥乎有文釋然易解今輒效為斯解然有其志無其才深媿其不逮也妄意之初竊謂法華為三乘際枯大事指南與華嚴實相終始於是兩載覃思華嚴經論深考吾佛降靈之本致復咨謀宗匠探賾講肆歷窮智者慈恩廣疏古今作者注解撫其所聞參諸圓覺楞嚴維摩諸經稽覈宗趣證正事法然後命筆雖立科釋義有異舊說而綜文會意稍合華嚴削繁錄實務在疏明一大事佛知見而未敢自許達者苟不是古非今以人廢言試詳覽之一校其當否

三通叙科判

釋經有利判教有宗如未有科以容其苞本如水有宗以會其支派嘗謂華嚴法華蓋一宗也何以明之夫法王應運出真兆聖唯為一事無有餘乘是以首唱華嚴特明頓法雖知根鈍且稱本懷及乎怖大昏惑乃權設方宜至於眾志真純則還示實法然則二經一始一終實相資發故今宗華嚴而

科釋也或謂華嚴純談實性獨被大機法華引權入實三根齊被二經旨趣迥不相及引彼釋此殆不知宗而愚竊觀信解品其父先來求子不得中止一城其家大富窮子遙見恐怖疾走正喻初說華嚴也臨終命子委付財物窮子歡喜得大寶藏正喻終說法華也迹此觀之始而驚怖終而親附者無異父窮之所棄達之所獲者無異寶既無以異何為而不應宗之耶又况二經以智立體以行成德放光現瑞全法界之真機融因會果開修證之捷徑凡所設法意緒並同二經相宗亦足見聖人說法始終一貫果唯一事無有餘乘旨趣稍馴幸無深誚也今科判此經二十八品分三初序分一品二正宗分十九品三流通分八品正宗二初三周開示十品自方便至學記八品說三周法授三根記自法師至寶塔二品授廣記以圓談前記會諸佛以圓證前法二顯妙勸持九品自提婆至安樂行三品顯功行之妙也自涌出至壽量二

品顯本迹之妙也自分別至不輕四品顯聞持之妙也使由前開悟依此弘持乃不失宗圓契妙法流通八品自神力品發起囑累品付授其餘六品全體前法示現行境流通是道名以行契智常然大用之門今初序分者開發正宗之端緒也其法有二自人天衆集無量義畢佛踞大定天雨四華六震撼無明之障緣一光現智境之實相此釋尊標本圓發其緒也其次弥勒示問文殊決疑引燈明之本光證今佛之瑞相此大士承流助發其緒也自餘廣引意皆懸叙一經本末欲達正宗必先明序分則於深經猶繹絲之得緒無所不盡猶陞堂之得序必臻其奧矣

四譯經人時

姚秦三藏法師鳩摩羅什奉

詔譯

姚秦東晉僞王也姓姚名興為秦國王梵語鳩摩羅什此云童壽謂童年而有耆德也奉秦王詔翻譯此經

五正釋序品

序品第一文四

一法時處

如是我聞一時佛住王舍城耆闍崛山中

如是之法我從佛聞此阿難結集時陞座最初之唱以證法有所授而已不必玄說一時之語乃佛遺言諸經通用故不定指也王舍城即靈山所附之城摩竭陀國之屬境也即西域人間耆闍崛山此云鷲頭山從形得名即古佛住處以古佛所住故稱靈鷲夫說法所依各隨宗趣華嚴展轉十處為圓彰法界圓覓依大光明藏為直示本起此依人間之城者同染淨以明蓮華之義據古佛之處者示祖述以繼燈明之道耳

二法會聽眾三

初聲聞

次菩薩

後人天

外護眾也

初聲聞眾二

初無事眾

此經會權歸實聲聞當機所以初列菩薩即主伴眾也人天與大比丘眾萬二千人俱皆是阿羅漢諸漏已盡無復煩惱逮得已利盡諸有結心得自在

佛常隨眾止千二百五十人今言萬二千者兼他方所集也阿羅漢義翻殺賊亦曰應供亦曰不生也善淵之心不能全一粘湛發識流逸奔境名漏諸漏者謂欲漏有漏無明漏皆以粘湛妄識為體為三界煩惱之本煩惱即貪嗔癡等十使為諸漏之緣戕害法身偏惱正性名煩惱賊言漏盡無惱者以本盡故緣無是謂殺賊也已利即證智斷惑之事文句謂三界因果皆為他事智斷功德乃名已利逮得已利乃堪為人天福田故號應供律文凡於應供須忖已德行全缺者使忖已利也盖夫苦身而作端坐而食擊蹠而拜逆立而受苟無已利之德其害非細行人識之諸有結者即惑習之業為二十五有之生因以因盡則果亡是謂不生也小乘有定無慧為偏縛未得自在今云心得自在乃是定慧兩足俱解脫人以明大阿羅漢影響眾尔

其名曰阿若憍陳如摩訶迦葉優樓頻螺迦葉伽耶迦葉那提

迦葉舍利弗大日捷連摩訶迦旃延阿菟樓駄劫賓那憍梵波
提離婆多畢凌伽娑蹉薄拘羅摩訶俱絺羅難陀孫陀羅難陀
富樓那弥多羅尼子須菩提阿難羅睺羅如是衆所知識大阿
羅漢等 此舉萬二千人領福上德即十大弟子之列也佛

有十大弟子為法王法臣各備衆德權示專門輔弼大化故
大迦葉頭陀第一身子智慧第一目連神通旃延論議阿菟
天眼富那說法善吉解空阿菟多聞波離持律羅云蜜行各
居第一如孔門十哲之列是其常數今從憍陳至羅云有二
十人者旁兼衆德圓彰法化也亦各有第一之德增一阿含
云憍陳初悟解優樓供養衆伽耶伏諸結那提善教化劫賓
知星宿憍梵受天供離婆不倒亂畢凌能苦坐薄拘壽不夭
俱絺善答難孫陀容挺特各第一也衆所知識者其德顯著
故諸名緣義非經要旨不必繁講 二有學衆

復有學無學二千人摩訶波闍波提比丘尼與眷屬六千人俱

羅睺羅母耶輸陀羅比丘尼亦與眷屬俱

此小聲聞衆尚在學地學於無學者也摩訶波闍此云大愛
道為尼衆首與耶輸皆示迹同塵影響衆也 次菩薩衆

菩薩摩訶薩八萬人皆於阿耨多羅三藐三菩提不退轉皆得
陀羅尼樂說辯才轉不退轉法輪供養無量百千諸佛於諸佛
所植衆德本常為諸佛之所稱歎以慈修身善入佛慧通達大
智到於彼岸名稱普聞無量世界能度無數百千衆生

菩薩摩訶薩者謂菩薩中之大菩薩即地上等覺之列揀非
地前也阿耨善提此云無上正遍正道陀羅尼此云惣持謂
得一切智惣持萬法也樂說辯即四辯之惣八地已上名不
退位五地七地得陀羅尼說決定法名不退輪諸皆歎德也
住不退位者得是道以處已轉不退輪者運是道以利人此
自覺覺他之德也以慈修身者意在洪濟善入佛慧謂能運
漚和通達大智則所證者明到於彼岸則所造者實此內德

也由是充實著現故名稱普聞此外德也內德通達則有見而化者外德普聞則有聞而化者故其所度至於無數百千皆大菩薩之德地前所無矣

其名曰文殊師利菩薩觀世音菩薩得大勢菩薩常精進菩薩不休息菩薩寶掌菩薩藥王菩薩勇施菩薩寶月菩薩月光菩薩滿月菩薩大力菩薩無量力菩薩越三界菩薩跋陀婆羅菩薩薩彌勒菩薩寶積菩薩導師菩薩如是等菩薩摩訶薩八万人俱此經以智立體故文殊居首蓋文殊具大智妙德為法身體為諸佛師為世間眼開佛知見莫先於此餘各表此經之一德也觀音助智行悲大勢具大德用精進念不退轉不息億劫勤修寶掌掌握法寶藥王應機發藥勇施一切能捨寶月覺體明淨月光能除癡闇滿月兼上二德大力負荷大法無量力對境不動越三界不現身意跋陀羅善護正見彌勒以慈續佛寶積能聚能利導師導邪入正此八萬之上首一經

之表法也蓋由大智開佛知見而助智以悲歷備眾德乃至導邪入正則一乘之體具萬行之用全矣不列普賢者自觀音已下皆普賢之行但初且以智立體開佛知見終至以行成德乃見普賢名專表也

後人天眾二

一天龍八部

初天眾

爾時釋提桓因與其眷屬二萬天子俱復有明月天子普香天子寶光天子四大天王與其眷屬萬天子俱自在天子大自在天子與其眷屬三萬天子俱娑婆世界主梵天王尸棄大梵光明大梵等與其眷屬萬二千天子俱

釋提桓因即帝釋也明月天子普香星天子寶光日天子也欲界六天曰四天王天忉利夜摩兜率化樂他化自在帝釋即忉利天主化樂天主號自在他化天主號大自在不言夜摩兜率者舉上下以談中也色界三禪十八天初禪三梵天其王為娑婆界主號尸棄大梵二禪三光天王號光明大

梵不舉餘天者言等以談之

次龍眾

有八龍王難陀龍王跋難陀龍王娑伽羅龍王和修吉龍王德
叉迦龍王阿那婆達多龍王摩那斯龍王優鉢羅龍王等各與
若干百千眷屬俱

德故二龍乃目連所降者娑伽羅云海和修吉云多頭德叉
迦云現毒阿耨達池名摩那斯云大身優鉢羅云青蓮池若
干即不定數謂不勝數也

次緊那羅眾

有四緊那羅王法緊那羅王妙法緊那羅王大法緊那羅王持
法緊那羅王各與若干百千眷屬俱

緊那此云疑神似人而有角可疑亦云歌神隨佛說法皆能
歌之故皆名法也法緊歌四諦妙緊歌十二緣大緊歌六度
持緊歌一來

次乾闥眾

有四乾闥婆王樂乾闥婆王樂音乾闥婆王美乾闥婆王美音
乾闥婆王各與若干百千眷屬俱

乾闥婆此云嗅香能尋香奏樂也樂謂歌舞等伎樂音謂鼓

節絃管美即伎中勝者美音音中勝者

次修羅眾

有四阿修羅王婆稚阿修羅王佉羅騫馱阿修羅王毗摩質多
羅阿修羅王羅睺阿修羅王各與若干百千眷屬俱

修羅此云非天多嗔無天行故婆稚云有縛好鬪戰故佉羅
云廣肩涌海水者毗摩質多云海水波音擊海波者羅睺云
障蔽能障日月

次迦樓羅眾

有四迦樓羅王大威德迦樓羅王大身迦樓羅王大滿迦樓羅
王如意迦樓羅王各與若干百千眷屬俱

迦樓羅此云金翅鳥常瞰龍大威懾龍大身勝羣大滿龍常
滿意如意領有此珠八部皆神眾能變形預會不列夜叉摩
睺羅略之也

二人王等眾

韋提希子阿闍世王與若干百千眷屬俱各禮佛足退坐一面
摩竭陀國頻婆羅王夫人號韋提希其子號阿闍世不舉人

民者王出而民從可知各禮佛足退坐一面言雖多不遍肅然有序 三大覺圓發六謂之六瑞 一說法瑞

爾時世尊四眾圍繞供養恭敬尊重讚歎為諸菩薩說大乘經名無量義教菩薩法佛所護念 二入定瑞

佛說此經已結跏趺坐入於無量義處三昧身心不動無量義經云無量義者從一實相生無量法眾集先說無量

義經經畢復入無量義定者所以發妙法端緒也示於一事一理一動一寂之間莫不具無量義然後可入妙法

三雨花瑞

是時天雨曼陀羅華摩訶曼陀羅華曼殊沙華摩訶曼殊沙華而散佛上及諸大眾 摩訶云大曼陀羅云適意曼殊沙云

柔軟皆天妙華也華表正因以因必趣果故散佛上而又及大眾者示此會當得正因也 四動地瑞

普佛世界六種震動

六震者動起涌震吼擊六種也東涌西沒動遍等遍之說皆不離此所以六震者表依六識翻破無明楞嚴說山河大地

皆無明感結本唯一真故云普佛世界 五眾喜瑞 爾時會中比丘比丘尼優婆塞優婆夷天龍夜叉乾闥婆阿修

羅迦樓羅緊那羅摩睺羅伽人非人及諸小王轉輪聖王是諸大眾得未曾有歡喜合掌一心觀佛

喜觀前瑞翹竚嘉應 六放光瑞三 一光相周亘 爾時佛放眉間白毫相光照東方萬八千世界靡不周遍

一光周亘全彰妙體也白毫即本覺妙明東方為不動智境萬八千界依根塵識十八界言也眾生迷此本明本智成十

八界自為限礙難造妙體故將說法華先現此瑞使行人直下自發本明照了本智則根塵識界通為智境無復限礙廓

達圓融故言萬八千界 二圓現法界事相 下至阿鼻地獄上至阿迦膩吒天於此世界盡見彼土六趣眾

生又見彼土現在諸佛及聞諸佛所說經法

阿鼻此云無間即地獄最下阿迦膩吒云質礙究竟即色界

極頂不言無色者無色非可見故上極諸天下窮地獄於此

世界盡見彼土所謂圓現 三圓現生佛始終

并見彼諸比丘比丘尼優婆塞優婆夷諸修行得道者復見諸

菩薩摩訶薩種種因緣種種信解種種相見行菩薩道復見諸

佛般涅槃者復見諸佛般涅槃後以佛舍利起七寶塔

始自比丘四眾修行得道次見菩薩諸佛行相終至涅槃起

塔是現眾諸佛之始終也一光東照周亘圓現如此詳悉

者直依智境示諸法實相也世間萬法自識境觀之悉皆幻

惑莫得其實自智境觀之如是性相因緣如是果報本末咸

一妙明無非實相若諸眾本明洞發本智現前則廓照圓

現與佛不殊妙體實相昭昭心目矣故文殊曰今佛放光明

助發實相義自後經文全顯斯旨故先發緒如此

四大士助發二

初弥勒示問二

初示疑發問

爾時彌勒菩薩作是念今者世尊現神變相以何因緣而有此

瑞今佛世尊入於三昧是不可思議現希有事當以問誰誰能

答者復作此念是文殊師利法王子已曾親近供養過去無

量諸佛必應見此希有之相我今當問爾時比丘比丘尼優婆

塞優婆夷及諸天龍鬼神等咸作此念是佛光明神通之相今

當問誰爾時弥勒菩薩欲自決疑又觀四眾比丘比丘尼優婆

塞優婆夷及諸天龍鬼神等眾會之心而問文殊師利言以何

因緣而有此瑞神通之相放大光明照于東方萬八千土悉見

彼佛國界莊嚴 弥勒為補處之主欲作當來之利故於此

示疑以問文殊為世間之眼欲發羣盲之智故於後援古以

證是謂助發 二以偈重宣

於是弥勒菩薩欲重宣此義以偈問曰

偈文二

初申問又二

初惣問六瑞所以

文殊師利 導師何故 眉間白毫 大光普照 雨曼陀羅
曼殊沙華 拈檀香風 悅可衆心 以是因緣 地皆嚴淨
而此世界 六種震動 時四部衆 咸皆歡喜 身意快然
得未曾有

此問放光 雨華動地 衆喜四瑞 也不問說法 入定二瑞者為
所常見故 二詳問光中所見二 一問圓現法界事相

眉間光明 照于東方 萬八千土 皆如金色 從阿鼻獄

上至有頂 諸世界中 六道衆生 生死所趣 善惡業緣

受報好醜 於此悉見 頌上極諸天下窮地獄等相也

又覩諸佛 聖主師子 演說經典 微妙第一 其聲清淨

出柔軟音 教諸菩薩 無數億萬 梵音深妙 令人樂聞

各於世界 講說正法 種種因緣 以無量喻 照明佛法

開悟衆生 若人遭苦 厭老病死 為說涅槃 盡諸苦際

若人有福 曾供養佛 志求勝法 為說緣覺 若有佛子

修種種行 求無上慧 為說淨道 頌見聞諸佛所說經

法也 聖主師子 說法無畏 演說經典 微妙第一 至今令人樂

聞 即以一乘 教諸菩薩 也講說正法 種種因緣 至為說正道

即以三乘 開悟衆生 也若人遭苦 至盡諸苦 際即小乘四諦

法四句 如次 配見苦 斷集 修道 證滅 也若人有福 至為說緣

覺 即中乘 十二緣法 也聲聞 三生種福 為厭苦 支佛百劫種

福 為求道 故有福 供佛 志求勝法 可授中乘 若有佛子 至為

說淨道 即大乘 六度法 也六度 以種種行為 用以無上慧 為

體行 得慧 濟即無染 著故名淨道 於二乘 言人於大乘 言佛

子者 止宿草 菴自同 使人成就 大志 乃命為子

文殊師利 我住於此 見聞若斯 及千億事 如是衆多

今當略說 結前開後也 二問圓現生佛始終

我見彼土 恒沙菩薩 種種因緣 而求佛道 或有行施

金銀珊瑚 真珠摩尼 瑇瑁瑪瑙 金剛諸珍 如婢車乘

寶飾輦輿	歡喜布施	回向佛道	願得是乘	三界第一
諸佛所歎	或有菩薩	駟馬寶車	欄楯華蓋	軒師布施
復見菩薩	身肉手足	及妻子施	求無上道	又見菩薩
頭目身體	欣樂施與	求佛智慧	文殊師利	我見諸王
往詣佛所	問無上道	便捨樂土	宮殿臣妾	剝除鬚髮
而被法服	或見菩薩	而作比丘	獨處閑靜	樂誦經典
又見菩薩	勇猛精進	入於深山	思惟佛道	又見離欲
常處空閑	深修禪定	得五神通	又見菩薩	安禪合掌
以千萬偈	讚諸法王	復見菩薩	智深志固	能問諸佛
聞悉受持	又見佛子	定慧具足	以無量喻	為眾講法
欣樂說法	化諸菩薩	破魔兵眾	而擊法鼓	

此頌修行之始後頌涅槃之終此即種種因緣信解相見而大要不出六度從或有行施至求佛智慧檀度也我見諸王至而被法服戒度也比丘處閑誦經忍度也菩薩勇猛為道

進度也離欲脩禪至讚諸法王禪度也智深志固至而擊法鼓智度也戒有三聚謂攝善法戒攝眾生成戒攝律儀戒諸王問道攝善法也捨臣妾攝眾生成也法服攝律儀也忍有三種謂生忍苦忍第一義忍比丘處閑誦經即閑林靜谷惡人惡獸為生忍礪比丘節為苦忍樂誦經典即第一義忍也離欲有三謂五塵欲二乘欲法愛欲皆離也得五神通者非凡夫五通以初學對佛分有漏無漏耳

又見菩薩	寂然宴默	天龍恭敬	不以為喜	又見菩薩
處林放光	濟地獄苦	令入佛道	又見佛子	未嘗睡眠
經行林中	勤求佛道	又見具戒	威儀無缺	淨如寶珠
以求佛道	又見佛子	住忍辱力	增上慢人	惡罵捶打
皆悉能忍	以求佛道	又見菩薩	離諸戲笑	及癡眷屬
親近智者	一心除亂	攝念山林	億千萬歲	以求佛道
或見菩薩	肴饍飲食	百種湯藥	施佛及僧	名衣上服

價直千萬 或無價衣 施佛及僧 清淨園林 千萬億種 栴檀寶舍
衆妙卧具 施佛及僧 如是等施 種種微妙 歡喜無厭 花果茂盛 流泉浴池
或有善薩 說寂滅法 猶如虛空 無數衆生 求無上道 或見菩薩
觀諸法性 無有二相 猶如虛空 又見佛子 心無所著
以此妙慧 求無上道

此廣頌菩薩行道因緣相見也天龍恭敬不以為喜菩薩自
重也處林放光濟地獄苦菩薩大悲也癡眷屬謂唯恣情欲
不能遷善者自未嘗睡眠至歡喜無厭乃六度衆行不復次
弟但隨所見或有說寂滅法等者或以教說求道也觀諸法
性等者或以覺觀求道也心無所著等者離教觀忘心迹以
求道也雖種種因緣相見不同無非實相妙行故於光中詳現
文殊師利 又有菩薩 佛滅度後 供養舍利 又見佛子
造諸塔廟 無數恒沙 嚴飾國界 寶塔高妙 五千由旬

縱廣正等 二千由旬 一一塔廟 各千幢幡 珠交露幔
寶鈴和鳴 諸天龍神 人及非人 香華伎樂 常以供養
文殊師利 諸佛子等 為供舍利 嚴飾塔廟 國界自然
殊特妙好 如天樹王 其華開敷
此頌涅槃之終也直曰縱橫曰廣四十里為一由旬天樹王
者忉利天負生樹寶華開時天界自然嚴飾妙好乃佛滅後
供養舍利果報也故諸佛子為供舍利嚴好如之 二請答
佛放一光 我及衆會 見此國界 種種殊妙 諸佛神力
智慧希有 放一淨完 照無量國 我等見此 得未曾有
佛子文殊 願決衆疑 四衆欣仰 瞻仁及我 世尊何故
放斯光明 佛子時答 決疑令喜 何所饒益 演斯光明
佛坐道場 所得妙法 為欲說此 為當授記 示諸佛土
衆寶嚴淨 及見諸佛 此非小緣 文殊當知 四衆龍神
瞻察仁者 為說何等 仁指文殊也

爾時文殊師利語弥勒菩薩摩訶薩及諸大士善男子等如我
 惟忖今佛世尊欲說大法雨大法雨吹大法螺擊大法鼓演大
 法義諸善男子我於過去諸佛曾見此瑞放斯光已即說大法
 是故當知今佛現光亦復如是欲令衆生成得聞知一切世間
 難信之法故現斯瑞 雨以一味露洽螺以一音亘徹鼓以
 号令羣衆義以開發隨宜 二引證二 初引燈明本始
 諸善男子如過去無量無邊不可思議阿僧祇劫爾時有佛号
 日月燈明如來應供正遍知明行足善逝世間解無上士調御
 丈夫天人師佛世尊 阿僧云無數劫云時分欲原光瑞本
 始而推之於無數不思之劫者此光此法固始於無始超乎
 數量也佛号日月燈者日晝晝月晝夜燈則照於日月所不
 照而通乎晝夜之道相續無窮彼佛妙智真明兼三者之德
 故以為号十号初言本終言迹中言德本謂真性一切如也

故曰如來迹謂道化人天尊仰故曰世尊德即萬德種智事
 也為良福田故應供養圓具四智故能正遍知萬行真明曰
 明行足善入塵勞窮盡萬法曰善逝世間解證無等等曰無
 上士化物不暴挺然不屈曰調御丈夫三界模範曰天人師
 自他覺滿曰佛惣而言之從如實道來具萬德應物為世所
 尊之號也

演說正法初善中善後善其義深遠其語巧妙純一無雜具足
 清白梵行之相為求聲聞者說應四諦法度生老病死究竟涅
 槃為求辟支佛者說應十二因緣法為諸菩薩說應六波羅蜜
 令得阿耨多羅三藐三菩提成一切種智

此叙燈明亦於一乘隨宜說三也初中後者指三乘之法皆
 應機契道無不善也藉權顯實故其義深遠方便隨機故其
 語巧妙本於一乘故純一無雜明菩薩行故具足清白梵行
 之相以一乘應三乘而說故云說應四諦等於二乘言求於

菩薩不言求者佛為大事出興本說教菩薩法故不待求於
餘乘非所願說特因樂小者求而後說也於聲聞言涅槃於
辟支菩薩言種智者聲聞厭生死苦取滅諦小果故進之於
究竟涅槃辟支利智菩薩大根故成之以一切種智一切種
智唯佛能具

次復有佛亦名日月燈明次復有佛亦名日月燈明如是二萬
佛皆同一字號日月燈明又同一姓氏頗羅隨弥勒當知初佛
後佛皆同一字名日月燈明十號具足所可說法初中後善其
最後佛未出家時有八王子一名有意二名善意三名無量意
四名寶意五名增意六名除疑意七名響意八名法意是八王
子威德自在各領四天下是諸王子聞父出家得阿耨多羅三
藐三菩提悉捨王位亦隨出家發大乘意常脩梵行皆為法師
已於千萬佛所植諸善本 此又引然燈本始以明妙法傳
續之由也自初燈明至最後燈明有二萬佛然燈即最後燈

明之王子也名字姓皆同者明道同也有八王子者聖人示
迹表法也依燈明有八意表從妙明真心出妙觀察意其用
有八也妙心本空而能有用故名有意此妙有也出乎妙心
用無不善故名善意此妙善也量不可測名無量意此妙量
也對境利用名寶意此妙寶也觸類而長名增意此妙增也
善能覺了名除疑意此妙覺也應物如響名響意此妙響也
建立萬法名法意此妙法也領四天下者未出家時未免物
累也聞父得道捨位出家者離情去累乃趣正覺之表也智
勝王子有玩之具聞父得道捨之而往其意同此心王出
三界家則八識之子隨出而為諸法師亦若是矣

二引瑞事同今四

一六瑞同

是時日月燈明佛說大乘經名無量義教菩薩法佛所護念說
是經已即於大眾中結加趺坐入於無量義處三昧身心不動
是時天雨曼陀羅華摩訶曼陀羅華曼殊沙華摩訶曼殊沙華

而散佛上及諸大眾普佛世界六種震動爾時會中比丘比丘尼優婆塞優婆夷天龍夜叉乾闥婆阿脩羅迦樓羅緊那羅摩睺羅伽人非人及諸小王轉輪聖王等是諸大眾得未曾有歡喜合掌一心觀佛尔時如來放眉間白毫相光照東方萬八千佛土靡不周遍如今所見是諸佛土

二示疑同

彌勒當知爾時會中有二十億菩薩樂欲聽法是諸菩薩見此光明普照佛土得未曾有欲知此光所為因緣

三說證同

昔眾見瑞欲知其緣亦如今眾

時有菩薩名曰妙光有八百弟子是時日月燈明佛從三昧起

因妙光菩薩說大乘經名妙法蓮華教菩薩法佛所護念

妙光即文殊前身昔因妙光而說者為其為世間眼能證此

四廣引五

一三昧同

六十小劫不起于座時會聽者亦坐一處六十小劫身心不動聽佛所說謂如食頃是時眾中無有一人若身若心而生懈倦

